

卷十一

書名 藝文類聚一百卷 嘉靖中天水胡繼宗刊本
撰者 唐 歐陽詢 撰
卷 卷十一
內容分類 子-類書 彙考-唐五代
索書號 子部-類書-2
編號 C5912500

藝文類聚卷第一

唐太子率更令弘文館學士歐陽詢撰

天部上天日月星雲風

天

大哉乾元萬物資始乃統天雲行雨施品物流形大明終始六位
時成乘六龍以御天乾道變化各正性命又曰立天之道曰陰與陽
又曰大行健尚書曰乃命羲和欽若昊天又曰皇天震怒命我文考
肅禮記曰天地之道博也厚也高也明也悠也久也日月星辰
繫繫物覆焉論語曰天何言哉四時行焉百物生焉老子曰天得
一春秋繁露曰天有十端天地陰陽水土金木火人凡十端天亦
喜哀樂之心與人相副以類合之天人一也爾雅曰穹蒼蒼天
也天夏爲昊天秋爲旻天冬爲上天春秋元命苞曰天不足西
九故天周九凡八十一萬里渾天儀曰天如雞子天大地小
大地各乘氣而立載水而浮天轉如車轂之運黃帝素問曰

彩色首頁1

東洋文化研究所漢籍目錄 編號: C5912500
東洋文化研究所漢籍目錄所藏漢籍善本文影像資料庫 索書號: 子部-類書-2
漢籍善本文影像資料庫文本藝文類聚一百卷 嘉靖中天水胡繼宗刊本
版權所有: 東京大學 東洋文化研究所
使用上的注意事項



謂之頌則不能雍容盛懿列伸玄妙欲謂之賦又不能敷演洪烈光揚緝熙故思竭愚稱受命述

藝文類聚卷第十

藝文類聚卷第十一

帝王部一 惣載帝王 天皇氏 地皇氏 人皇氏 有巢氏

燧人氏 太昊庖犧氏 帝女媧氏 炎帝神農氏

黃帝軒轅氏 少昊金天氏 顓頊高陽氏

帝嚳高辛氏 帝堯陶唐氏 帝舜有虞氏

帝禹夏后氏

惣載帝王

尚書刑德攷曰帝者天號也王者人稱也天有五帝以立名人有三王以正度天子爵稱也皇者煌煌也 春秋演孔圖曰正氣爲帝間氣爲臣秀氣爲人 禮斗威儀曰帝者得其根核王者得其英華霸者得其附枝故帝道不行不能王王道不行不能霸霸道不行不能守其身 管子曰明一者皇察道者帝通德者王謀得兵勝者霸 呂氏春秋曰始生之者天也養成之者人也能養天之所生而爲天子 春秋考耀文曰王者往也神所輪向人所樂歸 春秋繁露曰德俟天地者稱皇帝天祐而子之號

稱天子 董子曰古之人造文字者三畫而連其中謂之王三畫者天地
與人也連中者通其道也取天地與人之才而參之非王者其孰能當是
故王者必法天以大仁覆育萬物既化而生之又養而成之 韓詩外傳
曰君者何曰羣也敢羣天下萬物而除其害者謂之君 白虎通曰帝王
者號也號者功之表也所以表功明德號令臣下者也德合天地者稱帝
仁義合者稱王別優劣也 又曰接上稱天子者明以爵事天也接下稱
帝王者明位號天下至尊之稱 漢雜事曰古者天子稱皇其次稱王秦
承百王之末爲漢駁除自以德兼三皇五帝故并爲號 帝王世紀曰孔
子稱天子之德感天地洞八方是以化合神者稱皇德合天地者稱帝仁
義合者稱王 蔡邕獨斷曰上者尊位所在也太史令司馬遷記事當言
帝則依違之但言上不敢泄瀆者尊號言尊尊之義也乘輿出於律文曰
敢盜乘輿服御物謂天子所服食者也天子至尊不敢泄瀆言之故託於
乘輿也天子以天下爲家不以京師宮室爲常處當乘輿以天下故謂之
車駕天子自謂行在所今雖在京師言在行所也巡狩天下所奏事處皆

爲宮在長安則曰長安宮在泰山則曰泰山宮唯當時所在 禮記曰天
子者與天地參德配天地兼利萬物與日月並明明照四海而不遺微小
其在朝廷則道仁聖禮義之序燕處則聽雅頌之音行步則有環珮之聲
升車則有鸞和之音居處有禮進退有度百官得其宜萬事得其序 六
韜曰王者之道如龍之首高居遠望深視而審聽神其形而散其精若天
高而不可極若川深而不可測故可怒而不怒臣乃爲虎可殺而不殺大
賊乃發兵勢不行敵國乃強 管子曰黃帝立明堂之議上觀於賢也堯
有衢室之問下聽於民也舜有告善之旌而主不蔽也禹立諫鼓於朝而
備訊也湯有總街之廷觀民非也 武王有靈臺之宮賢者進也此古聖帝
明王所以有而勿失得而勿止也 尸子曰孔子曰商汝知君之爲君乎
子夏曰魚失水則死水失魚猶爲水也孔子曰商知之矣 莊子曰赫胥
氏之時民居不知所爲行不知所之含哺而熙鼓腹而遊 又曰昔容成
氏大庭氏栢皇氏軒轅氏尊盧氏伏羲氏當是時也結繩而用之甘其食
美其服樂其俗安其居鄰國相望雞狗之音相聞民至老死不相往來若

此時則至治也 孫卿子曰人主者守至約而詳事至狹而切垂衣裳不下簾席之上而海內之民莫不願得以爲帝王 呂氏春秋曰五帝先道而後德故德莫盛焉三王先德而後故事莫功焉五伯先事而後兵故兵莫強焉 韓子曰明王制其臣下者二柄而已矣二者刑德也殺戮之謂刑慶賞之謂德 淮南子曰帝者體太一王者法陰陽霸者則四時君者用六律體太一者牢籠天地彈壓山川含吐陰陽申洩四時紀綱八極經緯六合覆露照導普汜而無私 地之和形萬類之體含氣化物以成形類則四時者春生夏長秋收冬藏取與有節出入有時開闔張歛不失其序喜怒剛柔不雜其理用六律者生之與殺也賞之與罰也予之與奪也非此無道 又曰人主者以天下之目視以天下之耳聽以天下之智慮以天下之力動是故號令能下究而臣情得上聞百官修道羣臣輻湊喜不以賞賜怒不以罪誅 潛夫論曰太古之時兆黎初載未有上下而自順序天未事焉君未設焉末後矯處或相凌虐爲萌巨害於是天命聖人使司牧之勿令失性四海蒙利草

木被德恭儉奉戴謂之天子 歲晉潘 棄輿箴曰皇極肇建兩儀既分彝倫未序萬邦糾紛國事明主家奉嚴 各有攸尊德用不勤煌煌四海藹藹萬乘匪賢焉倚匪哲焉憑左輔右 前疑後承一日萬機業業競競夫出其言善則千里是應而莫余違亦 邦有徵辛作璇室而夏興瑤臺糟丘酒池象著玉杯叔世道衰末俗化流耽樂逸遊荒淫沉湎不式古訓而好是佞辯不遵正路而覆車是踐滅敗之効載在前典匪唯凌夷厥世用殄故曰樹君如之何將民是司牧視之猶傷知其寒燠故能撫之斯柔而敦之斯睦無遠不懷靡思不服夫豈厭縱一人而玩其耳目內迷聲色外荒馳逐不修政事而終於顛覆 論漢賈誼過秦論曰秦孝公據崤函之固擁雍州之地君臣固守以窺周室有席卷天下包舉宇內囊括四海之意并吞八荒之心當是時也高君佐之內立法度務耕織脩守戰之具外連衡而鬪諸侯諸侯恐懼會盟而謀弱秦不愛珍器重寶肥饒之地以致天下之士合從締交相與爲一當此之時齊有孟嘗趙有平原楚有春申魏有信陵此四賢者皆明智而忠信寬厚而愛人尊賢重士約從離橫

兼韓魏燕楚宋衛中山之衆嘗以什倍之地百萬之師仰關而攻秦秦人開關延敵九國之師遁逃而不敢進秦無亡矢遺鏃之費天下諸侯已困矣及至秦始皇奮六世之餘烈振長策而御宇內吞二周而亡諸侯履至尊而制六合執敲扑以鞭笞天下威振四海南取百越之地以爲桂林象郡百越之君俛首係頸委命下吏乃使蒙恬北築長城而守藩籬却匈奴七百餘里胡人不敢南下而牧馬士不敢彎弓而報怨然後踐華爲城因河爲池據億丈之城臨不測之谿以爲固良將勁弩守要害之處信臣精卒陳利兵而誰何天下已定始皇自以爲關中之固金城千里子孫帝王萬世之業也始皇旣沒餘威振于殊俗然而陳涉甕牖繩樞之子叱隸之人而遷徙之徒也材能不及中人率罷散之卒將數百之衆轉而攻秦山東豪俊蜂起而亡秦族矣且夫天下非小弱也雍州之地崤函之固自若也陳涉之位非尊於齊楚燕趙魏宋衛中山之君也鋤耰棘矜非銛於鉤戟長鎗也謫戍之衆非抗於九國之師也深謀遠慮行軍用兵之道非及曩時之士也然而成敗異變功業相反試使山東之國與陳涉度長絜大

比權量力則不可同年而語矣然秦以區區之地致萬乘之權招八川而朝同列百有餘年矣然後以六合爲家崤函爲宮一夫作難而七廟隳身死人手爲天下之笑者何也仁義不施而攻守之勢異也魏王粲難鍾荀太平論曰聖莫盛於堯而洪水方割丹朱淫虐四族凶佞矣帝舜因之而三苗畔戾矣禹又因而防風爲戮矣此三聖古之所大稱也繼踵相承且二百年而刑罰未嘗一世而乏也然則此三聖能乎三聖能平則何世能致之乎孔子稱曰唯上智與下愚不移不移者丹朱四凶三苗之謂也當紂之世殷罔不小大好草竊姦究周公遷殷頑民于洛邑其下愚之人必有之矣周公之於三聖不能踰也三聖有所不化矣有所不移矣周公之不能化殷之頑民所可知也苟不可移必或犯罪罪而弗刑是失所也犯而刑之刑不可錯矣孟軻有言盡信書不如無書有大而言之者刑錯之屬也豈億兆之民歷數十年而無一人犯罪一物失所哉謂之無者盡信書之謂也魏曹冏六代論曰昔者夏殷周歷世數十而秦二世而亡何則三代之君與天下共其民故天下同其憂秦王獨制其民故傾危而

莫救先王獨知治之不能久也故與人共治之知獨守之不能固也故與人共守之兼親疎而兩用參同異而並立是以輕重足以相鎮親疎足以相衛兼并路塞逆節不生及其衰也桓文率禮包茅不貢齊師伐楚宋不城周晉戮其宰王綱弛而復張諸侯傲而復肅二霸之後浸以陵遲吳楚憑江負固方城雖心希九鼎而畏迫宗姬姦情散於曾懷逆謀消於脣吻斯豈非信重親戚任用賢能枝葉碩茂本根賴之至於王赧降爲庶人猶枝幹相持得居虛位海內無主四十餘年秦據勢勝之地騁譎詐之術征伐關東蠶食九國至於始皇乃定天位曠日若彼用力若此非深根固蒂不拔之道乎漢祖奮三尺之劍騁烏合之衆五年之中而成帝業自開闢已來其興功立勲未有若漢之易者也夫伐深根者難爲功摧枯朽者易爲力理勢然也漢鑒秦之失封植子弟及諸呂擅權圖危劉氏而天下所以不傾動百姓所以不易心者徒以東牟朱虛受命於內齊代吳楚作衛於外向使高祖踵亡秦之法忽先王之制則天下以傳非劉氏有也大魏之興觀五代之存亡而不用其長策觀前車之傾覆而不改其轍跡子弟

王空虛之地君亡使民之失宗室竄於閭閻不聞邦國之政權均正夫勢齊凡庶內無深根不拔之固外無盤石宗盟之助非所以安社稷爲萬世之業也 晉陸機辨亡論曰昔漢氏失御姦臣竊命禍基京畿毒徧宇內皇綱弛紊王室遂卑於是羣雄蜂駭義兵四合吳武烈皇帝慷慨下國電發荆南權略紛紜忠勇伯世威稜則夷羿震盪兵交則醜虜授馘遂掃清宗祊蒸禋皇祖于時雲興之將帶州飈起之師跨邑雖兵以義合同盟戮力然皆包藏禍心阻兵怙亂或師無謀律喪威稔寇忠規武節未有如此其著者也武烈既沒長沙桓王逸才命世弱冠秀發招攬遺老與之述業神兵東驅奮寡犯衆攻無堅城之將戰無交鋒之虜誅叛柔服而江外底定飭法脩師則威德翕赫將北伐諸華誅鉏千紀旋皇興於夷庚反帝座于紫闥挾天子以令諸侯清天步而歸舊物戎車旣次羣凶側目大業未就中世而殞用集我大皇帝以奇蹤襲於逸軌睿心因平令圖從政咨於故實播憲稽平遺風而加以篤固申之以節儉疇咨俊茂好謀善斷束帛旅於丘園旌命交乎塗巷故豪彥尋聲而響臻志士希光而景驚異人

輻輳猛士如林謀無遺譖舉不失策故遂割據山川跨制荆吳而與天下爭衡矣故魏人請好漢氏乞盟遂躋天號鼎峙而立於是講八代之禮蒐三王之樂告類上帝拱揖羣后虎臣毅卒循江而守長棘勁鏃望威而奮庶尹盡規於上四民展業于下化協殊裔風衍遐圻乃俾一介行人撫巡外域巨象逸駿擾於外閑明珠瑋寶耀於內府珍瑰重跡而至奇玩應響而赴輜軒騁於南荒衝霄息於朔野齊民免干戈之患戎馬無晨服之虞而帝業固矣爰及末葉羣公既喪然後黔首有瓦解之志皇家有土崩之釁累歷命應化而微王師躡運而發卒散於陣民奔于邑城池無藩籬之固山川無溝阜之勢軍未浹辰而社稷夷矣雖忠臣發憤烈士死節將奚救哉夫曹劉之將非一世所選向時人之師無曩日之衆戰守之道抑有前符險阻之利俄然未改而成敗輒理古今詭趣何哉彼此之化殊授任之才異也 又辨亡論下曰昔三方之王魏人據中夏漢氏有岷益吳制荆楊而掩交廣曹氏雖功濟諸華虐亦深矣其民怨劉公因險飾智功已薄矣其俗陋夫吳桓王基之以武太祖成之以德聰明睿達懿度深遠矣其

求賢如弗及恤民如稚子接士盡威德之容親仁罄丹府之愛拔呂蒙於戎行擢潘濬於係虜推誠信士不恤人之我欺曷能授器不患權之我逼地方幾萬里帶甲將百萬其野沃其民練其器利其財豐東負滄海西阻險塞長江制其區宇峻山帶其封域國家之巨利未有弘於茲者矣借使中才守之以道善人御之有術敦率遺典勤民謹政循定策守常險則可以長世永年未有危亡之患易曰湯武革命順乎天玄曰亂不極則治不形言帝王之因天時也古人有言曰天時不如地利易曰王侯設險以守其國言爲國之恃險也又曰地利不如人和在德不在險言守險之由人也吳之興也參而由焉孫卿所謂合其參者也及其亡也恃險而已又孫卿所謂捨其參者也夫四州之萌非無衆也大江之南非乏俊也山川之險易守也勁利之器易用也先政之策易循也功不興而禍遽何哉所以用之者失也故先王達經國之長規審存亡之至數謙已以安百姓敦惠以致人和寬冲以誘俊乂之謀慈和以結士民之愛是以其安也則黎元與之同慶及其危也則兆庶與之共患安與衆同慶則危不可得也危與

下共患則其難不足恤也夫然故能保其社稷而固其土宇麥秀無悲殷之思黍離無愍周之感矣 晉干寶晉紀惣論曰昔高祖宣皇帝以雄才碩量應運而仕至於百姓與能大象始構矣世宗承基太祖繼業始當非常之禮終受備物之錫至于世祖遂享皇極正位居體聿修祖宗之志思輯戰國之苦腹心不同公卿異議而獨納羊祜之策至于咸寧之末遂排羣議而仗王杜之決汎舟三峽介馬桂陽役不二時江湖來同掩唐虞之舊域班正朔於八荒太康之中天下書同文車同軌牛馬被野餘糧棲畝行旅草舍外閭不閉雖太平未洽亦百代一時矣二十餘年而河洛爲墟戎羯稱制二帝失尊山陵無所何哉樹立失權託付非才四維不張而苟且之政多也夫天下者大器也器大者不可以小道理勢重者不可以爭競擾古先哲王知其然也是以扞其大患而不有其功禦其大災而不尸其利是以感而應之悅而歸之如晨風之鬱北林魚龍之趨淵澤也然後設禮文以理之斷刑罰以威之故衆悅其教而安其俗君子勤禮小人盡力廉耻篤於家閭邪僻銷於曾懷又况可奮臂大呼聚之以干紀作亂之事乎加之朝寡醇德之士鄉乏不二之老風俗淫僻趣向失所學者以莊老爲宗而黜六經談者以虛薄爲辨而賤名檢當官者以望空爲高而笑勤恪劉頌屢言治道傳咸每糾邪正皆謂之俗吏若夫文王日昃不暇食仲山甫夙夜匪懈者蓋共嗤黜以爲灰塵而相詬病矣由是毀譽亂於善惡之實情慝奔於貨欲之塗選者爲人擇官官者爲身擇利其婦女莊擲織維皆取成於婢僕未嘗知女功絲枲之業中饋酒食之事也故皆不耻淫佚之過不拘妬忌之惡有殺戮妾媵有黷亂上下父兄不之罪天下莫之非又况責之聞四教於古脩貞順於今以輔佐君子者哉禮法刑政於此大壞如室之斯構而去其鑿契如水斯積而決其隄防如火斯畜而離其薪燎也國將亡本必先顛其此之謂乎

天皇氏

顏峻始學篇曰天地立有天皇十三頭號曰天靈治萬八千歲 洞冥記曰一姓十三人也 徐整三五曆紀云歲起攝提元氣肇有神靈一人有十三頭號天皇 春秋緯曰天皇地皇人皇兄弟九人分九州長天下也

遁甲開山圖曰天皇被跡在柱州崑崙山下

地皇氏

顏峻始學篇曰地皇十一頭治八千歲帝系譜曰地皇治一萬八千歲以火德王 遁甲開山圖曰地皇興於熊耳龍門山

人皇氏

顏峻始學篇曰人皇九頭兄弟各三百歲依山川土地之勢裁度爲九州各居其一方因是而區別 榮氏曰人皇兄弟九人生於刑馬山身九色有巢氏

顏峻始學篇曰上古皆穴處有聖人教之巢居號大巢氏皇甫謐以爲有巢在女媧之後 遁甲開山圖曰石樓山在琅琊昔有巢氏治此山南

燧人氏

尚書大傳曰燧人爲燧皇以火紀官 禮含文嘉曰燧人始鑽木取火炮生爲熟食人無腹疾遂天之意故爲燧人

太昊庖犧氏

易曰古者庖犧氏之王天下也仰則觀象於天俯則觀法於地觀鳥獸之文與地之宜近取諸身遠取諸物於是始作八卦以通神明之德以類萬物之情結繩而爲網罟以畋以漁蓋取諸離 禮含文嘉曰伏羲德洽上下天應以鳥獸文章地應以龜書伏羲乃則象作易 帝王世紀曰太昊帝庖犧氏風姓也虵身人首有聖德都陳作瑟三十六絃 魏陳王曹植庖犧贊曰木德風姓八卦創焉龍瑞名官法地象天庖廚祭祀罟網魚畋瑟以像時神德通玄

帝女媧氏

淮南子曰往古之時四極廢九州裂天不兼覆地不周載猛獸食精民也鷙鳥攫老弱於是女媧鍊五色石以補蒼天斷鼇足以立四方極也 蒼天神四極正淫水涸冀州平狡蟲死精民生背方州抱圓天 帝王世紀曰帝女媧氏亦風姓也作笙簧亦虵身人首一曰女希是爲女皇其末諸侯共工氏任知刑以強伯而不王 魏陳王曹植女媧贊曰古之國君造簧作笙禮物未就軒轅纂成或云二皇人首虵形神化七十何德之

靈

神農氏

易曰神農氏作斲木爲耜揉木爲耒耨之利以教天下蓋取諸益日中爲市致天下之貨交易而退各得其所蓋取諸噬嗑 周書曰神農之時天雨粟神農耕而種之作陶冶斤斧爲耜鉏耨以墾草莽然後五穀興以助菓蓏實 春秋命歷序曰有神人名石年蒼色大眉戴玉理玉理猶玉英神農也 呂氏春秋曰神農教曰士有當年不耕者則天下或受其饑矣女有當年不績者則天下或受其寒矣故夫親耕妻親績 賈誼書曰神農以爲走禽難以久養民乃求可食之物嘗百草察實醎苦之味教民食穀 帝王世紀曰炎帝神農氏姜姓也人身牛首長於姜水有聖德都陳作五絃之琴始教天下種穀故號神農氏諸侯夙沙氏叛不用命箕文諫而殺之炎帝退而修德夙沙之民自攻其君而歸炎帝 **魏陳王曹植神農贊曰** 之胤火德承木造爲耒耨導民播穀正爲雅琴以暢風俗

黃帝軒轅氏

易曰黃帝垂衣裳而天下治蓋取乾坤也 左傳曰剡子曰黃帝以雲紀官故爲雲師而雲名 河圖挺佐輔曰黃帝修德立義天下大治乃召天老而問焉余夢見兩龍挺白圖以授余於河之都天老曰河出龍圖雒出龜書紀帝錄列聖人之姓號興謀治太平然後鳳皇處之今鳳皇以下三百六十日矣天其受帝圖乎黃帝乃祓齋七日至於翠嫫之川大鱸魚折溜而至乃與天老迎之五色畢具魚汎白圖蘭葉朱文以授黃帝名曰錄圖 龍魚河圖曰黃帝時有蚩尤兄弟八十一人並獸身人語銅頭鐵額食沙石子造立兵杖刀戟大弩威振天下誅殺無道不仁慈萬民欲令黃帝行天下事黃帝仁義不能禁蚩尤黃帝仰天而嘆天遣玄女下授黃帝兵信神符制伏蚩尤帝因使之主兵以制八方蚩尤沒後天下復擾亂黃帝遂畫蚩尤形像以威天下天下咸謂蚩尤不死八方萬邦皆爲弭伏 春秋內事曰軒轅氏以土德王天下始有堂廡高棟深宇以避風雨 列子曰黃帝喜天下之戴己也養正命娛耳目乃喟然歎曰養一已治萬物其患如此於是放萬機舍宮寢退而間居大庭之館齋心服形三月不親

政事晝寢而夢遊於華胥華胥氏國不知距齊國幾千里齊中蓋非舟車足力之所及神遊而已其國入水不溺入火不熱乘空如履寢寢虛若處牀黃帝既寤怡然自得又二十八年天下大治幾若華胥國矣淮南子曰黃帝治天下而力牧太山稽輔之使強不得掩弱衆不得暴寡人民保命而不夭歲時熟而不凶百官正而無私輔弼公而不阿道不捨遺市不預賈城郭不閉邑無盜賊人相讓以財狗彘吐菽粟於道路而無忿爭之心於是日月精明星辰不失其行風雨時節五穀登熟虎豹不妄噬鸞鳥不妄搏鳳皇翔於庭麒麟遊於郊青龍進駕飛煌伏皂飛黃出西方其狀如皂歷也諸北僭耳之國莫不獻其貢職皆北極之夷國史記封禪書曰黃帝得遷上天羣臣葬其衣冠 帝王世紀曰黃帝有熊氏少典之子姬姓也生壽丘長于姬水龍顏有聖德受國於有熊居軒轅之丘故因以爲號治五氣設五量及神農氏衰黃帝修德撫民諸侯咸去神農而歸之黃帝於是乃擾馴猛獸與神農氏戰于阪泉之野三戰而克之又徵諸侯使力牧神皇直討蚩尤氏擒之于涿鹿之野使應龍殺之于凶黎之丘凡五十二戰而

天下大服有妃生二十五子黃帝在位百年而崩年百一十歲矣或傳以爲仙或言壽三百歲葬于上郡陽周之橋山 抱朴子曰黃帝生而能言役使百靈可謂天授自然體之者猶後不敢端坐而得道故陟下屋而受丹經到鼎湖而飛流珠登崆峒而問廣成之具茨而事大隗適東岱而奉中黃入金谷而諮子心論導養而質玄素二女精推步則訪山稽力牧講占候則詢風后著體訖則受雷岐審文戰則納五音之策窮神姦則記澤之辭相地理則書青鳥之說救傷殘則綴金冶之術故能畢記秘要窮盡道真遂勒升龍以高濟與天地乎罔極晉羣秀黃帝頌曰邈矣黃軒應天載靈通幽遠覽觀象設形誕敷厥訓彝倫攸經德從風流化與雲征皇猷允塞地平天成爰登方岳封禪勒成紛然鳳舉龍騰太清遠茲九土陟彼高冥民斯攸慕涕泗沾纓遐而不墜式頌德聲魏陳王曹植黃帝贊曰少典之孫神明聖哲上德承火赤帝是滅服牛乘馬衣裳是制氏雲名官功冠五列 又黃帝三鼎贊曰鼎質文精古之神器黃帝是鑄以像大一能輕能重知凶識吉世衰則隱世和則出 晉曹毗黃帝贊曰軒

轅應玄期幼能摠百神體鍊五靈妙氣含雲露津擦石曾城岫鑄鼎荆山
濱豁焉天扉闢飄然跨騰鱗儀轡灑長風褰裳躡紫宸 周庾信黃帝見
廣成晝贊曰治身紫府問政青丘龍湖鼎沒丹竈珠流疎雲即雨落木先
秋至道須極長生可求

少昊金天氏

左傳曰郯子曰我高祖少昊摯之立也鳳鳥適至故紀於鳥爲鳥師而鳥
名焉 帝王世紀曰少昊帝名摯字青陽姬姓也降居江木有聖德邑于
窮桑以登帝位都曲阜故或謂之窮桑即圖識所謂白帝朱宣者也故稱
少昊號金天氏在位百年而崩贊陳思王曹植少昊贊曰祖自軒轅青
陽之裔金德承土儀鳳帝世官鳥號名殊職別系農正扈氏各有品制

顓頊高陽氏

史記曰帝顓頊高陽者靜深有謀䟽通知事北至幽陵南至交趾西濟流
沙東至蟠木動靜之物大小之神日月所照莫不砥屬 帝王世紀曰帝
顓頊高陽氏黃帝之孫昌意之子姬姓也母曰景僕蜀山氏女爲昌意正

妃謂之女樞金天氏之末女樞生顓頊於若水首戴干戈有聖德父昌意
雖黃帝之嫡以德劣降居若水爲諸侯及顓頊生十年而佐少昊二十而
登帝位平九黎之亂以冰事紀官南正重司天以屬神北正黎司地以屬
民於是民神不雜萬物有序始都窮桑徙商丘命飛龍効八風之音作樂
五英以祭上帝世有材子八人號八凱顓頊在位七十八年年九十一歲
歲在鶉火而崩葬東郡頓丘廣陽里魏曹植帝顓頊贊曰昌意之子
祖自軒轅始誅九黎水德統天以國爲號風化神宣威暢八極靡不砥虔

帝嚳高辛氏

史記曰帝嚳高辛氏者黃帝之曾孫也父曰蟠極蟠極父曰玄囂玄囂父
曰黃帝自玄囂與蟠極不得在位帝嚳生而神靈自言其名日月所照風
雨所至莫不從助 帝王世紀曰帝嚳高辛氏姬姓也有聖德年十五而
佐顓頊四十登位都亳以人事紀官故以勾芒爲木正祝融爲火正蓐收
爲金正玄冥爲水正后土爲土正是五行之官分職而治諸侯於是化被
天下遂作樂六莖以康帝位世有材子八人號曰八元亦納四妃卜其子

皆有天下元妃有台氏女曰姜嫄生后稷次有娥氏女曰簡翟生高次陳
豐氏女曰慶都生放勳次姬訾氏女曰常儀生摯帝摯帝在位七十年年百
五歲而崩葬東郡頓丘廣陽里魏陳王曹植帝嘗贊曰祖自軒轅玄
囂之裔生言其名木德帝世無寧天地神聖靈察教弭四海明並日月

帝堯陶唐氏

摯帝

尚書堯典曰若稽古帝堯曰放勳欽明文思安安允恭克讓光被四表格
于上下克明俊德以親九族九族既睦平章百姓百姓昭明協和萬邦黎
民於變時邑 論語曰大哉堯之爲君也巍巍乎唯天爲大唯堯則之蕩
蕩乎民無能名焉巍巍乎其有成功也煥乎其有文章 春秋元命苞曰
堯眉八采是謂通明歷象日月璇璣玉衡 尚書中候曰帝堯即政榮光
出河休氣四塞龍馬銜甲赤文綠色龍形像馬甲所以藏其文赤而綠 甲似龜背五色
有列星之分斗政之度帝王錄紀興亡之數 大戴禮曰宰我曰請問帝
堯孔子曰其仁如天其智如神就之如日望之如雲富而不驕貴而不豫
淮南子曰人之所以樂爲天子者以其窮耳目之欲而適躬體之便也今

高臺曾樹人之所麗也而堯采椽不斷斤題不析言梁柱相并珍怪奇味

人之所美也而堯糲粱之飯藜藿之羹文錦狐白人之所好也而堯布衣
掩形鹿裘禦寒養生之具厚不加以增之以大任重之憂故舉天下而傳
之舜若釋負然 帝王世紀曰帝堯陶唐氏初姓也母慶都孕十四月而
生堯於丹陵名曰放勳鳥庭河勝或從母姓伊氏年十五而佐帝摯受封
於唐爲諸侯身長十尺嘗夢天而上之故二十而登帝位都平陽置敢諫
之鼓命羲和四子羲仲羲叔和仲和叔分掌四時方嶽之職故名曰四嶽
也諸侯有苗氏處南蠻而不服堯征而克之于丹水之浦乃以尹壽許由
爲師夔放山川谿谷之音作樂大章天下大和百姓無事有五十老人擊
壤於道觀者歎曰大哉帝之德也老人曰吾日出而作日入而息鑿井而
飲耕田而食帝何力於我哉於是景星曜於天甘露降于地朱草生於郊
鳳皇止於庭嘉禾孳於畝醴泉湧於山焦僥民來貢沒羽厨中自生肉脯
其薄如翼形挫鼓自生風使食物寒而不暑名曰翼脯又有草夾階而生
隨月生死王者以是占日月之數惟盛德之君應和而生故堯有之名曰

冀夷始封稷契咎繇褒進伯禹納舜于大麓後年二月又率羣臣刻璧爲書東沉洛水言天命當傳舜之意今中候運衡之篇是也九堯即位九十八年年百一十八歲乃殂百姓如喪考妣三載四海遏密八音葬于濟陰之成陽西北是爲穀林堯取富宜氏女曰女皇生丹朱又有庶子九人皆不肖故以天下命舜曰咨爾舜天之曆數在爾躬允執其中四海困窮天祿永終及堯三年喪畢舜踐天子位 符子曰堯曰余坐華殿之上森然而松生於棟余立櫺扉之內霏焉而雲生於牖雖面雙闕無異乎崔嵬之冠蓬萊雖背墉櫺無異乎迴巖之縈崑崙余安知其所以安 魏陳王曹植帝堯畫贊曰火德統位父則高辛克平共工萬國同塵調適陰陽其惠如春巍巍成功配天則神

帝舜有虞氏

尚書舜典曰慎徽五典五典克從納于百揆百揆時敘賓于四門四門穆穆納于大麓烈風雷雨弗迷帝曰咨爾舜詢事考言乃言底可績三載汝陟帝位 禮記曰子曰舜其大智也與好察邇言隱惡而揚善執其兩端

用其中於民其斯以爲舜乎 又曰昔舜作五絃之琴以歌南風

樂部論

語曰無爲而治者其舜也與夫何爲哉恭己正南面而已矣 孝經援神

契曰舜龍顏重瞳大口手握褒

重瞳象電多精光也大口象斗星口也握

也雖書靈准聽曰有人方面日衡重華

日衡衡有肩表如日者也

握石推懷神珠

鍾平輕重者也握石鍾謂知旋機

玉衡之道也陳神珠喻有聖智也

西王母授益地圖

西王母得益地之圖來獻

孟子曰雞初鳴而起孳孳爲善者舜之徒

也雞初鳴而起孳孳爲利者蹠之徒也

蹠盜

又曰堯之於舜使其子九男

事之妻以二女焉百年牛羊倉廩備以養舜於畎畝之中而後舉加諸上

位 又曰舜聞一善言見一善行若決江河需然莫之能禦也 尸子曰

舜一徙成邑再徙成都三徙成國堯聞其賢徵之草茅之中與之語禮樂

而不逆與之語政至簡而行與之語道廣大而不窮於是妻之以嬪媵之

以娥九子事之而託天下焉 韓子曰歷山農者侵畔舜往耕耨年而耕

者讓畔河濱漁者爭坵舜往漁耨年而漁者讓長東夷之陶者苦窳舜往

陶耨年而器以牢

呂氏春秋曰舜有子九人不子其子而授禹至公也

陶耨年而器以牢

呂氏春秋曰舜有子九人不子其子而授禹至公也

帝王世紀曰帝有虞氏姚姓也目重瞳故名重華字都君有聖德始遷於負夏販於頓丘債於傳虛家本異州每徙則百姓歸之堯於是見舜於貳宮設饗禮迭爲賓主南面而問政堯乃試以五典遂舉八凱使佐后土以揆百事舉八元使布五教于四方舜於是有大功二十故夢眉長與髮等堯乃賜舜以昭華之玉老而命舜代已攝政舜東巡狩登南山觀河渚受圖書褒賜羣臣尊任伯禹稷契皋繇伯益地有苗氏負固不服禹請征之舜曰我德不厚而行武非道也吾前教由未也乃修教三年執于戚而舞之有苗請服立誹謗之木申命九官十二牧三載一考績三載黜陟幽明禹爲司空功被天下棄爲后稷播時百穀稷爲司徒敬敷五教皋繇爲士典刑惟明倬爲共工莫不致力益爲朕虞庶物繁植伯夷爲秩宗三禮不闕變爲樂正神人以和龍爲納言出內惟允於是俊乂在官羣后德讓百僚師師以五采章施于五色爲服以六律五聲八音協治治用之和蒸民乃粒萬邦作乂庶績咸熙乃作大韶之樂簫韶九成鳳皇來儀擊石拊石百獸率舞故孔子稱韶盡美矣又盡善也景星曜於房羣瑞畢致地出乘

黃舜於是德被天下薦於天使禹攝政有苗氏叛南征崩于鳴條殯以瓦棺葬於蒼梧九疑山之陽是爲陵零謂之紀市在今營道下有羣象爲之耕魏陳王曹植帝舜贊曰顯頊氏族重瞳神聖克協頑瞽應唐泣政除凶舉俊以齊七政應曆受禪顯天之命晉夏侯湛虞舜贊曰有虞愔愔揖讓鼓琴垂拱臨民詠彼南音世澄道玄天下混心思民王度如玉如金晉庾闡虞舜像贊并序曰夫至道玄妙非器象所載靈化潛融非軌迹所傳故道資冲樸則謂之三皇德被羣生則號稱舜禹是以先王因其會通制爲准極功格於天則配于上帝法施於民則載在祀典然後名教彰於至治王道煥乎無窮故茲堂之構也有自來矣然樹寢所以栖神而寢非神之所期立像所以表德而像非德之所存若乃廢其軌景洞其玄真雖冥照之鑒獨朗天下惡乎注其耳目哉遂乃顯圖靈像廓其廟壇俾天光焜於宇宙南風散乎五絃豈謂神道之妙可寄之於有涯哉蓋亦暢悠悠者之心也其辭曰玄像焜耀萬物含靈飛龍在天陽德文明神道雖寂務由機生擁琴高詠寄和五聲玄風旣暢妙盡無名民鑒其朗孰測窈

冥 周庾信舜干戚盡贊曰平風變律擊石來儀先齊七政更服三危朱
干獨舞玉戚空麾南風一曲恭已無爲碑後魏溫子昇舜廟碑曰懷山
不已龍門未闢大道御世天下爲公感夢長人明歟及陋釐降二女結友
九男執耜歷山耕夫所以謝畔施畧雷澤漁父於是讓川亦旣登庸以之
納錄九官咸事百揆時叙有大功於當世集歷數而在躬受文祖之命致
昭華之玉班五瑞於羣后稷六宗於上玄舞干戚而遠夷賓棄金璧而幽
靈應青雲浮洛榮光塞河符瑞必臻休祥咸萃以君人之大德爲帝王之
稱首陟方之駕遂往蒼梧之空不歸爰自先民實存舊廟旣緝葺房遂鎮
理席龍駕帝服蓋依稀於慕舜交鼓巨瑟實髣髴於聞韶其辭曰虹氣降
靈姚墟誕聖樹陰未徙帝圖已定乃賓四門以齊七政天眷功高民歸德
盛治旣蕩蕩化亦巍巍南風在詠西環有歸疑山永逝湘水長違靈官肅
肅神館微微宋顏延之爲張湘州祭虞帝文曰惟哲化神繼天作聖
藏器漁陶致身愛敬是以二妃嬪德九子觀命在麓不迷御衡以正唐歷
旣終虞道乃光咨堯授禹素俎采堂百齡厭世萬里陟方敬詢故老欽咨

聖君職奉西湘虔屬南雲神之聽之匪酒伊章

帝禹夏后氏

尚書大禹謨曰受命于神宗率百官若帝之初從舜初授帝政事奉行之論語曰子曰

禹吾無間然矣孔子推禹功之德大能復間其間非飲食而致孝乎鬼神惡衣服而致

美乎黻冕禮含文嘉曰禹卑宮室垂意於溝洫百穀用成神龍至靈龜

服玉女敬養天賜春秋元命苞曰禹之時民大樂其駢三聖相繼故夏

者大也左傳曰禹會諸侯於塗山執玉帛者萬國尚書中候曰伯禹

曰臣觀河伯面長人首魚身出水曰吾河精也授臣河圖尚書璇璣鈴

曰禹開龍門導積石玄圭出刻曰延喜玉受德天賜佩禹功旣成天出玄圭以賜之古者以

德佩禹有治水功呂氏春秋曰禹南濟平江黃龍負舟事具詳淮南子曰

禹沐淫雨擲疾風決河疏河鑿龍門闢伊闕乘四載隨山刊木平治水土

定七百國又曰禹爲水以身解於陽肝之河解禱也陽吳越春秋曰禹

案黃帝中經見聖人所記曰在九疑山東南天柱號曰宛委承以文玉覆

以盤石其書金簡青玉爲字編以白銀皆瑑其文禹乃東巡登衡山求之

赤繡文衣男子自稱玄夷蒼水使者來候禹令齋三月更求之禹乃三日齋登宛委山取得書得通水之理遂周行天下使益疏記之名山海經也鬻子曰禹飯一饋而七起曰吾不恐四海之士留於道路也恐其留吾門也是以四海之士皆至禹當朝廷門可以羅雀帝王世紀曰伯禹夏后氏姁姓也生於石砌虎臯大口兩耳參漏首戴鈎鈐臂有玉斗足文履已故名文命字高密身長九尺二寸長於西羌西羌夷人也其父既放降在疋度有聖德夢自沆於河西四嶽師舉之舜進之堯堯命以爲司空繼鯀治水乃勞身涉勤不重徑尺之壁而愛日之寸陰手足胼胝故世傳禹病偏枯足不相過至今巫稱禹步是也又納禮賢人一沐三握髮一食三起堯美其績乃賜姓姁氏封爲夏伯故謂之伯禹天下宗之謂之大禹年百歲崩于會稽因葬會稽山陰縣之南今山上有禹冢井祠下有羣鳥芸田又曰禹葬衣衾三領桐棺三寸葛以繡之下不以泉上不通屍既葬收餘壤爲壠若叅耕之畝符子曰禹讓天下於奇子奇子曰君言佐舜勞矣鑿山川通河漢首無髮股無毛故舜也以勞報子我生而逸不能爲君之

勞矣贊魏陳王曹植夏禹贊曰吁嗟夫子拯世濟民克卑空室致孝鬼神蔬食薄服紼冕乃新厥德不回其誠可親疊疊其德溫溫其仁尼稱無間何德之純又曰禹治水贊曰嗟夫夏禹寔勞水功西鑿龍門疏河道江梁岐既闢九州以同天賜玄圭奄有萬邦又禹渡河贊曰禹濟于河黃龍負船舟人並懼禹歎仰天予受大運勤功恤民死亡命也龍乃弭身周庚信渡江贊曰三江初鑿九谷新成風飛鷁涌水起龍驚樂天知命無待憂生危舟遂靜亂揖還平